

**Naqqiut**

7. november 2023-mi akissuteqaammut aappassaaneerneqartumut taarsiut  
(ilassutitut isumaliutissiisoqarnerata kingorna aaqqissugaq)

**2022-mut Nunatta Karsiata naatsorsuutaasa akuerineqarnissaannik siunnersuut**  
(Aningaasaqarnermut Akileraartarnermullu Naalakkersuisoq)

**Akissuteqaat****Aappassaaneerinninneq**

Naalakkersuisut sinnerlugit Kukkunersiuinermut Ataatsimiititaliaq 2022-mut Nunatta Karsiata Naatsorsuutaanut peqqissaartumik isumaliutissiissusiorneranut qujassuteqarfigaara. Ataatsimiititaliap isumaqatigiilluni 2022-mut Nunatta Karsiata naatsorsuutaasa akuerineqarnissaannik aalajangiiffigisassatut siunnersuutip akuerineqarnissaannik inassuteqarnerat, Naalakkersuisut iluarisimaarpat.

2022-mi kukkunersuisut pingasunik nutaanik oqaaseqaateqarnerat, ukiullu siuliineersup ataatsip naammassineqarnera Naalakkersuisut arajutsisimanngilaat.

Kukkunersiuinermut Ataatsimiititaliaq isumaliutissiissummini arlalinnik oqaaseqarfiginnippoq, inassuteqateqarluni uparuaanerillu saqqummiussilluni. Naalakkersuisuut akissuteqaammi uani oqaaseqarfigisat inassuteqaasiorfigineqartullu tamakkerlugit oqaaseqarfigisinnaanngilaat, naatsumilli oqaaseqarfigisat inassuteqaasiorfigineqartullu pingaarnerit iserfigisallugit, sinnerilu oqaaseqarfiginagit tusaatissatut tiguneqarput. Tamatuma saniatigut uparuaanerit saqqummiunneqartut oqaaseqarfigineqarput.

Kukkunersiuinermut Ataatsimiititaliap Deloittemit EY-millu kukkunersiuinermik nalunaarusiaat marluk toqqammavigalugit, Inatsit tunngaviusussaq pillugu isumalioqatigiissitamut siulittaasoqarfik Inatsit Tunngaviusussaq pillugu Isumalioqatigiissitamik aqutsineranut naammaannartumik uparuaanissamut pissutissaqalersitsivoq. Naalakkersuisut uparuaaneq isumaqatigaat, taannalu tusaatissatut tiginerpoq.

Kukkunersiuinermut Ataatsimiititaliaq taamatut aamma immikkoortoq 40 (Ilinniartitaanermut, Kulturimut, Timersornermut Ilageqqarnermullu Naalakkersuisoqarfik) naammaannartumik uparuaavoq, tassani ukiumi naatsorsusiorfiusumi 2022-mi uteqattaartumik annertuumillu missingersuutit qaangerneqartarput. Immikkoortumi aningaasaqarnermik aqutsinerup nukittorsarneqartariaqarnera Naalakkersuisut isumaqatigaat, tamannalu siunertaralugu suliniutinik aallartitsipput.

Naggasiullugu Kukkunersuinermit Ataatsimiititaliaq isumaginninnermut immikkoortumi kommunit aningaasartuutaannik utertitsinermi, aningaasartuutit kukkusumik piffissalernerqarnerannut naammaannartumik uparuaavoq. Immikkoortumi nakkutilliineq nukittunerusuuppat, Naalakkersuisut annertunersumik ajornartorsiummut iliuseqarnerusinnaasimagaluarnerannik isornartorsiuineq toqqammaveqarpoq. Naalakkersuisut uparuaaneq isumaqatigaat, nakkutilliinerullu nukittorsarnissaanut suliniuteqarlutik.

Pisortatut aaqqissuussanut allanut pissaqaqatigiissutsit naligiissarneqarneranut pitsanngoriaatinut Kukkunersuinermit Ataatsimiititaliaq pitsaasumik uparuaavoq. Uparuaaneq pitsaasoq Naalakkersuisut qujassutigaa.

Taamattaaq Kukkunersuinermit Ataatsimiititaliaq Qitiusumik Naatsorsuuseriffiup akiligassaqartunik oqimaaqatigiissitsinermik sulinermik nukittorsaanermik nangittumik aallussineranut pitsaasumik uparuaavoq. Uparuaaneq pitsaasoq Naalakkersuisut qujassutigaa.

Naggataatigut Kukkunersuinermit Ataatsimiititaliap Kukkunersuisut Deloitte Nunatta Karsiata Naatsorsuutaanik kukkunersuisussatut inassutigaa. Naalakkersuisut tamanna taperserpaat.

Isumaliutissiisummik tunniussinerup kingornatigut ataatsimiititaliaq tapiliussatut isumaliutissiisummik tunniussivoq. Tapiliussatut isumaliutissiisummi ataatsimiititaliap inassutigaa, uranimut politikki ingerlanneqartoq qulaajarneqassasoq. Naalakkersuisut ataatsimiititaliap kissaataa naapertorlugu qulaajaanermik suliaqassapput.

Naggasiullugu Kukkunersuinermit Ataatsimiititaliaq isumaliutissiisummik suliaqarnermini annertuumik sulineranut qujassuteqarfigaara.

Taamatut oqaaseqarlunga, siunnersuut naggataarutaasumik aappassaaneerneqarneranut, Inatsisartunut kajumittumik suliaqanngortippara.